

**Protokol o saradnji u traženju nestalih osoba između
Vijeća ministara Bosne i Hercegovine i Vlade Crne Gore**

Protokol o saradnji u traženju nestalih osoba između Vijeća ministara Bosne i Hercegovine i Vlade Crne Gore

Vijeće ministara Bosne i Hercegovine i Vlada Crne Gore (u daljem tekstu: Strane),

- želeći doprinijeti ublažavanju humanitarnih posljedica ratnih sukoba na prostoru bivše Socijalističke Federativne Republike Jugoslavije (u daljem tekstu: SFRJ),
- svjesne potrebe za saradnjom u traženju nestalih osoba i afirmirajući pravo porodica da saznaju istinu o svom nestalom članu,

sporazumjele su se kako slijedi:

Član 1.

Protokolom o saradnji u traženju nestalih osoba između Vijeća ministara Bosne i Hercegovine i Vlade Crne Gore uređuju se međusobni odnosi, obaveze i način zajedničkog rada Strana u traženju osoba koje su nestale u oružanom sukobu na prostoru bivše SFRJ, u periodu od 30.4.1991. do 14.2.1996. godine, a na teritoriji država potpisnica ovog Protokola.

Član 2.

Strane su saglasne da bez odlaganja preduzmu sve potrebne mjere i unaprijede međusobnu saradnju radi rješavanja svih slučajeva osoba koje se vode kao nestale.

U skladu s kriterijima koje utvrđuje Međunarodna Konvencija za zaštitu svih osoba od prisilnog nestanka, nestala osoba jeste osoba o kojoj porodica nema nikakvih vijesti i/ili je prijavljena na osnovu pouzdanih informacija kao nestala osoba usljed oružanog sukoba koji se desio na teritoriji bivše SFRJ.

Član 3.

Strane će bez odlaganja, preko svojih nadležnih tijela, razmijeniti raspoložive informacije i dokumentacije od značaja za rješavanje slučajeva nestalih osoba.

Član 4.

Strane će posebnu pažnju posvetiti saradnji u razmjeni raspoloživih informacija i dokumentacije o utvrđivanju postojanja grobnih mjesta, procesu ekshumacija i/ili identifikacija posmrtnih ostataka nestalih osoba.

Strane će osigurati poštovanje standarda i principa koji se odnose na zaštitu podataka o ličnosti (privatnosti), uključujući i medicinsku dokumentaciju.

Član 5.

Ukoliko se radi o ekshumacijama i/ili identifikacijama od zajedničkog interesa, Strane će blagovremeno obavještavati jedna drugu o vremenu ekshumacije i/ili identifikacije i omogućiti prisustvo predstavnika druge Strane u svojstvu posmatrača.

Prisustvo će biti omogućeno i zainteresovanim međunarodnim organizacijama, u skladu s njihovim mandatom na teritoriji države one Strane koja provodi ekshumaciju i/ili identifikaciju.

Član 6.

Strane će preko svojih nadležnih tijela uspostaviti saradnju radi olakšavanja i ubrzanja postupka primopredaje posmrtnih ostataka nestalih osoba, saradivati će u obavještanju porodica koje treba da pristupe postupku identifikacija, osiguravati dokumentaciju neophodnu za prijenos i predaju posmrtnih ostataka identifikovanih osoba, snositi neophodne troškove za prekogranični prijevoz posmrtnih ostataka, kao i troškove za prijevoz posmrtnih ostataka na teritoriji svoje države.

Član 7.

Strane će usaglasiti i utvrditi radna pravila i procedure za realizaciju ovog Protokola u roku od 90 dana od dana potpisivanja.

Član 8.

Nadležna tijela i organizacije obaju Strana će u okviru svojih nadležnosti pružati pomoć u realizaciji obaveza preuzetih zaključivanjem ovog Protokola.

Strane se slažu da nadležna tijela navedena u prethodnom stavu redovno prate izvršavanje ovog Protokola i usklađuju saradnju u oblasti traženja nestalih osoba, te u tom cilju, po potrebi i na zahtjev jedne od Strana, organizuju sastanke.

Član 9.

Protokol stupa na snagu danom prijema posljednje pismene obavijesti kojom Strane obavještauju jedna drugu, diplomatskim putem, o ispunjenju unutrašnjih pravnih procedura potrebnih za njegovo stupanje na snagu.

Ovaj Protokol ostaje na snazi do završetka procesa traženja osoba koje se vode kao nestale u oružanom sukobu na prostoru bivše SFRJ.

Ovaj Protokol može se u svako doba izmijeniti i dopuniti obostranim pismenim pristankom Strana. Izmjene i dopune stupaju na snagu u skladu s postupkom utvrđenim u stavu 1. ovog člana.

Sačinjeno u Sarajevu, dana 11. oktobra 2019. godine, u 2 originalna primjerka, svaki na službenim jezicima Bosne i Hercegovine (bosanskome, hrvatskom i srpskom jeziku) i crnogorskom jeziku.

Za Vijeće ministara Bosne i Hercegovine

Za Vladu Crne Gore
